

Maleaki

Nabi Maleaki arye seklamuk yupu

**Israel ninye ulamik noutam arye, Allah el si Yahweh
arye nabi Maleaki dam yanuka nyabuk yupu**

1 ¹ Allah Yahweh^a arye, Maleaki biti, ‘Israel yala ninye unyakak peterelbinamyame,’ nyapdeibuk yupu ara ani. “Israel ninye ati aminyan talak kanye imun ning upnamle ning ap, teleb kibuka un ning ap ati, laka nyapkiniba, ance Israel ninye sik noutamak nyalbinamyame,” nyabuk.

**Allah Yahweh arye Yakub biti, bico tenebukce, el weit
koproba Esau biti ara, ‘Na like,’ nyabuk yupu**

² Allah Yahweh arye, el mapu Israel ninye nirya ati nyabuk, “Na arye anggun nirya ati, bico tenesunune. Bukni, anggun Israel ninye arye tamubuka, Allah na ti nyanululume. ‘Kume, Allah Yahweh anda nun ti yata ning winisiminya deice arye bico tenebuka melisilyam do?’ nyabuka asinululume. Bukni, na Allah Yahweh arye tamubuka nyapsine. Ara, Esau elda Yakub el weit koproba ulamuk do? Na arye

^a **1:1** *Yahweh* – Allah el si koproba ara, ‘Yahweh’ ulule. Allah arye Musa ati, ayupu lakak arye nyabuk (Keluaran 3:14). Ibrani yupu deice arye ahuruf ‘YHWH’ aning uk sekenyake. Ibrani yupu nyanyak ninye arye, ‘Allah el si koproba lakak kum nyaptibye’ tenen, ilil ulule. Ilil ulula ati ara, sikce huruf ‘YHWH’ aning uk sekenyake. Bukni, Allah arye Musa ati, “Kume na si ara, ‘Yahweh’ unune. Asi Yahweh bikmunce asi uk erebuka na ati kinamnululume,” nyabuk. Ibrani kili sal arye huruf YHWH sekenyak bukni, ‘Ahuruf uk sekiyop ura, ayupu nyana ara, walwal upsilyak’ tenen, nunce ‘Yahweh’ sekenyabe. Indonesia Alkitab noutam ara, Allah el si Yahweh kum sekenyake. Sikda, ‘TUHAN’ sekenyake. Bukni, Indonesia Alkitab noutamak nirya, ‘TUHAN’ eipmunyop ura, ‘Ara Allah el si Yahweh sekenyak sukum,’ tenenamululume. Allah el si Yahweh nyana ara, fia teleb uke. Tonda, laka nyana yupu nomor 49 dipdelulume.

Yakub el ti, weik arye se bicoe tenelamsirye, weika arye melilamse do, kum do? Kume, weika arye melilamse.

³Diba, Yakub biti bico tenelamse bukni, el du koproba Esau biti ara, yu kanye bolamsirye, ‘Anye bira na like,’ tenelamse. Ayu ulamnuka deice arye, Esau el ulamuk mutuku nirya ara, amutuku deice dakuka akunum malye kibuka batakse. Winibuka batakse ning ara, na arye el ulamuk mutuku tuku nirya ara, dobuka talye bai tam, kam ulamle ning, bai kam atonun ning ati, fata mutuku ulamikak uk aripsiba, malye uk winilamuka ati, ninye arye el mutuku noutamak teleb kibuka kum unyake,” Allah arye nyabuk.

⁴Nyabukce, ayupu ton nyabuk. Winilamsibuk, Esau el tam nang Edom mutuku unyak ninye arye, “Kume, nun ulamupu asik mutuku ara, dakuka uluplopsik bukni, nun babye tuba tamubuka lipsisikuka dopnamapca,” nyabuka yupu talinyake. Nyabuka yupu talinyaka ati ara, sik aninye arye, tamubuka dobica babye, na Allah Yahweh arye aning-aning nirya talibuka, im deice yin talin malaikat sik, weik deiyoknye^b ununa anya arye, na arye ila tamubuka, sik mutuku asik dopnamaka nirya ara, dakuka uluplonamne. Winipniba, yuk mutuku ninye nirya arye aning eibikirye, sik Edom yala nang ulamik mutuku ati ara, ‘Se, amutuku ara, malye winin ning deiyok talibuka, ulamik mutuku,’ nyanamake. Tonda, Edom ninye ati ara, ‘Se, Allah Yahweh arye sik Edom mutuku ulamik ninye ati, fia yu ulule,’ nyanamake.

⁵Aning nirya winipniba, anggun Israel ninye nirya, anggun bidamnye asing arye ipmunce, nyapnamlume, “Se, dipkoprop, Allah Yahweh elda weik mikip arye Israel ninye unyap mutuku ap, yuk pera mutuku noutamak nirya ap, weik mambul fil dolule. Nun kum unyap mutuku noutamak babye, elce talibuka, mambul fil uk dolule,” nyabuka nyanamlume.

Allah Yahweh arye el si erena aik fum tam fil dona deiyok nang, imam-imam nang sik dem ati, wenena yupu deice arye nyabuk yupu

⁶Na Allah Yahweh, aning-aning nirya talibuka, im deice yin talin malaikat sik weik deiyoknye unune. Na arye, na si eren aik fum tam, fil dona deiyok nang, anggun imam-imam nang ati nyapsine.

Anggun teneipdelulume. Anggun kele, yata ninye do, sik mapu arye, sik ni yapu ati kanye delinyake. Atonun, weik nang amutam unyakce,

^b 1:4 *Allah Yahweh* – Ibrani yupu deice Allah el si ati sekik ning ara, ‘Yahweh Sebaot’ sekik. Aning ara ayat 4, 6 dan 8 noutamak sekik. ‘Ayupu deiyok ara moubuka kel kipnamlum’ tenen, nunce lak nyabuka sekupu. Ara, ‘Allah Yahweh aning-aning nirya talilirye, im deice yin talin malaikat sik weik deiyoknye’ tenen, asi nyalamik. Ibrani yupu deiyok ning ara, akunuma.

aik fum tam talye fil donyak ninye ara, sik deiyok nang ati kanye delinyake. Na ara, anggun Ni Koproba Allah Yahweh unune. Tonda anggun weik deiyoknye unune. Ati ara, yata ning ati, anggunce na ti, si kum erenululum do? Na ara, weik mambulnye unun bukni, anggunce na ti, ilil kum usulul do? Dikprop anggunce na ap, na si ap ati, malye nyanululume. Bukni, aning nyapsiniba, angguncuk tamubuka nyalulume, “Nunda yata ning wininyaba deice arye, an si ati malye nyanyap do?” nyabuka asipdenulume.

⁷Na arye nyapsine. “Anggunce na si eren ati, kam un ning opmunce, aning bobuka, na arina ati, na si erena aik dam keil yangapdeiplumak, adeice uku dalulum bukni, yata deiyok ati, kam un ning malye ning uk bobuka, na dam boyangamunce, na ti arenululum do? Winimunya deice arye, na si ati malye nyanumunce, yaninululume. Bukni, anggunce na ti, asinululume. “Ara yata wininyaba deice arye, ‘Allah elda mambulnye kume,’ tenebuka an si ati yanikinyap do?” nyabuka asimnululume. Na arye tamubuka nyapsine.

Kume, ara minop talak arye, na arye anggun ti, ‘Kam un ning fia teleb ning uk arenamnululume,’ nyapdeiamsise bukni, anggunce kam un ning, nong malye ning uk bobuka, na si eren ati kintinipdeibik sukumuk boyanganululume. Winimunya deice arye, na si yaninumunce, ‘E, Allah el ap, el arina ati keil lelepdeibupu sukum ap ara, mambul kume,’ tenemunce, malye ululume, nyapsine.” Allah arye nyabuk.

⁸Minop talak ara, ‘Kam un ning nong fia bol teleb ning uk obuka, na arelyanganamnululume,’ nyapdeiamsise bukni, anggunce aning batakuka, na arina ati, bobuka delilyanganululum kam un ning ara, nong bol malye ning uk delilyanganululume. Ara, asing kuamlye ning ap, isin talin ning ap, yok bulakamlye ning ap, bobuka arelyanganululum ning ara, teleb ning arenululum do? Kume, malye ning uk arenululuma ati ara, fia malye ululume.

Anyapmasin ning atonun, uk bobuka, anggun deiyoknye Gubernur dam bobuka bitumce, areptum bukni, elce, ‘E, teleb ning boyanmaniaka ati, dikprop si erenmaniyake’ tenen, kange deibuka, telebe nyapsutu do? Kume, aning ara, kum winipmantoe. Na Allah Yahweh,^c aning-aning nirya talibuka, im deice yin talin malaikat, sik weik deiyoknye uniry, nyapsine.

⁹Aning bobuka, yangamunye ning ara, anggunce na arina deiyok nang, imam-imam nang ati, ‘Winitalak ara nun malye wininyap ning lyena ati, boyanmap ning deice arye, Allah moropsumunba, nun malye wininyap ning kilibuka lyepsilirye, namin kipnamsil,’ nyabuka, weik

^c 1:8 *Yahweh* – Asukum noutamak ara, Ibrani yupu deice arye, Allah el si ati, ‘Yahweh Sebaot’ sekik. Ayupu bikna ati, ayupu deiyok noutamak laka aryuk sekupu.

yupu arye nyaptumba, na Allah ati moropnitinga babye, na Allah arye kekebuka kum lyepronamsine. Anggunce malye ning uk bobuka, na dam boyanganululumce, arenululuma ati ara, yata deiyok ati kanye deipsitinye do? Kume, anggunce malye uk ululuma anya arye, kanye kum deipnamsine.

¹⁰Ati ara, na Allah Yahweh aning-aning nirya talibuka, im deice yin talin malaikat, sik deiyok ununye birye nyapsine. Teleb ning ara, anggun kan-kan noutamak, tonoknye mambul kanye bopturye, na si eren aik bublan ara, tirikdongoptuba, na kanye deiptinye. Ara, urdem ati kume. Akat bublan tirikdongoptuop ura, anggunce kam ning malye ning bobuka, na arina ati, uku kum dongompantonnye ton upsutue. Bukni, na arina ati, fia malye ning uk arelyanganumunya ati, na arye kanye kum deipsine. Anggun ti na lik unulule. Tonda, anggunce malye ning arilyanganumunya ning ara, fia kum dopronamne.

¹¹Anggun Israel ninye arye, na si ati, 'Elda mambul kume,' tenenululum bukni, yuk pera mutuku ninye, im sirya mutuku sirya nirya unyak ninye arye, na tibuk 'Se, Allah ara, mambul weiknye' tenen, sikce na ti si fia erekirye, na ti kininyake. Ara, berentam talak arye dipdongobuka, lukunyan noutamak babye, na ti kibuka si ereninanyake. Wininyaka ara, dan mutuku do nirya, ninye mutuku-mutuku nirya arye, na si erena ati, nintong teleb ning, uku dongobikirye, si erenyake. Tonda, sik malye winin ning kilina ati, kam ning fia teleb ning uk, obuka arelyanganinyake. Na Allah Yahwe^d aning-aning nirya talibuka, im deice yin talin malaikat sik deiyok ununye birye nyapsine.

¹²Bukni, anggun Israel ninye arye na ti malye kipdeipnulume. Ara, na si eren ati, kintiniplumce aning-aning nirya, malye ning uk dobuka delilyangalulumak, ara, 'Allah Yahweh el si erenak fia mambul kume,' teneluluma deice arye, malye winiplume. Tonda, anggunce malye tenelulum din ning uk dobuka, na ti arilyangamunya deice arye, 'Allah el arina ati, keil lelebuka yangeibupe ning babye, mambule kume,' tenelulumce, malye ululume.

¹³Anggunce nyamunye yupu ara ani. 'Se, nunce aning nirya dobuka, arilyangalamububa, lik usulule. Allah Yahweh ati, el si erena ap, el amutam una ap, el yupu moubuka kekena ap ara, ikin usulula ati ara, nun walwale,' nyalulume. Tonda, na arye anggun ti, 'Wininamlulume, aning ara kum wininamlulume. Malye ning ani, teleb ning ani,' nyapdeiamsise yupu ati, anggunce, 'Kume, aning ara, ikin asa aniryuk kekebuka dobolbanyaba anya arye, nun like,' tenemunce, ayupu nirya batakalulume.

Na Allah Yahweh, aning-aning nirya talibuka, im deice yin talin malaikat, sik deiyoknye birye nyapsine. Na arye nyapsine, anggun ton

^d 1:11 *Allah* – Ibrani yupu deice arye 'Yahweh Sebaot' sekik.

teneipdelulume. Anggunce, na arina ati, nong bol malye kam un ning bobuka, arilyanganumunye ning ara, teleb do, malye do? Ara, kam ulul ning ubula dolomunye ning ap, yok kwalilamle ning ap, uk dilamle ning ap bobuka, na ti arelyanganululume. Winimunye bukni, anggunce tenemunya ara, 'Aning ara, Allah Yahweh arye dolosululce, kanye deipnamsile,' tenelulum do? Na Allah Yahweh arye nyapsine. Anggun malye winilulum ning kilina ati, ato malye kam un ning doproptinirye, anggun malye winimunye ning namin kibuka, lyepropsitinye do? Kume, ara kum winipmanto.

¹⁴Ati ara, anggunce na si eren ati ining ning ara, bol malye bomlye ning obuka boyakirye, 'Nunda Allah Yahweh el si erena ati, yim domba fia teleb ning aribape,' nyabuka tilila yupu nyanyak nang ara, Allah Yahweh arye sik anang ati, 'Malye unyake' tenen, supliba, ikin weik ning sik dam yalyop ura, malye uk wininamake.

Ara, urdem ati kume. Na Allah Yahweh, talinye kum unune. Na ara, aning-aning nirya ap, tukwak ninye mutuku-mutuku nirya ap talibuka, sik weik deiyoknye ununa ati ara, na ara dipkoprop fia weik mambulnye, Raja unune. Na Allah Yahweh, aning-aning nirya talibuka, im deice yin talin malaikat nirya, sik weik deiyoknye unune. Na Allah ninye deiyok nang nirya deice tam, eitam ununa ati ara, winipniba yuk yala ninye im sirya, mutuku sirya nirya arye, na ti kibuka, si ereninyake. Allah arye nyabuk.

Imam-imam nang, Allah el yu sik nong deice deibuk yupu

2 ¹Allah arye, el si erena aik fum tam, fil dona deiyok nang, sik imam-imam nang ati nyabuk.

Na arye, "Winiplulume," nyapdeipnusun yupu ara, ara anggun imam-imam nang atibuk nyapsine. ²Anggun nirya ara, moubuka kekepnunululume. Kekepmunce, anyapdeipnusun yupu ati, mambul kanye bobuka, fia moubuka talipmunce, unamlume. Na ap, na si ap ati, 'Allah Yahweh ara, fia mambule' tenen, teleb kibuka, si erenamnululume. Na Allah Yahweh im deice yin talin malaikat nirya, sik weik deiyoknye ununa ati ara, na arye nyapsin yupu ara, moubuka kekepnululume. Anggunce na kibuka, si kum erepnumunyop ura, na arye anggun deice, malye yupu nyabuka sunamsine.

Aning uk kum bukni, tonda na arye anggun ti, teleb ning ton arisine ning babye, malye nyabuka sunamsine. Aning nirya malye ning uk aripsinyop ura, dolonamlulume. Na arye anggun ti, 'Wininamlulume, aning kum winipmunyop ura, ikin ning arenamsine,' nyapsise yupu nirya ara, anggunce, 'Aning ara, mambul kum ati ara, daupmalye' tenen, batakanululuma ati, dipkoprop na arye anggun ti, akunum deiyok koubuka sunamsine. Winisununa deiyok ara, anggunce na nyapdeiamse ning ara, batakluma ati susunune.

³ Anggunce na nyapdeiamse yupu kum kekenululuma ati ara, diksukum na arye anggunce delinamlum mapu, anggun deice ara, wenepnamne. Tonda anggun ining ning obuka, uku dalyangalulum ning, domba ap, kambing ap, sapi ap ara, aning sik dei ap, dei suruk ap dobukapna arye, imam-imam nang anggun asok deice likilinamsine. Ara, ‘Sik alye weik daknamak’ tenen, winipnamsine. Winipsinyop ura, anggun nong dobuka, malye ning donokolbamunba, weik aulyakuk bobinuka, donoknamsine.

⁴ Winipsinyop ura, na arye anggun ti, ‘Aning ara wininamlulume, aning ara kum wininamlulume,’ nyapdeiamsise ning ara, biknamlume. Ara, ‘Se, nunce, aning ara mambul kume, tenebupue bukni, dipkoprop Allah Yahweh arye, ayupu nyapsuka ati, nun malye winibupue,’ tenenamlume. Na arye, ‘Anggun malye winilulum ning batakmumce, teleb uk unamlume. Kumop ura, weik arye wenepnamsine,’ nyapdeiamsise yupu ara, na arye anggun Lewi yala nang ati, ‘Aning uk wininamlulume,’ nyabuka, nyalin yupu nyapdeiamse ning ara, ‘Sikce moubuka talinamak’ tenen nyapsise. Na ara, Allah Yahweh im deice yin talin malaikat nirya, sik deiyoknye nyapsine.^e

⁵ Na arye, anggun Lewi yala ninye ati, nyalin yupu nyapdeiamse ning deiyok ara, ‘Anggun Lewi yala nang, anyalina yupu deice arye, anggun nirya diksukumuk umunyop ura, kam unamlume. Tonda, na ap, anggun ap kanye deipdabirye, teleb uk neika unamabe’ tenen, ayupu nyapdeiyamsise. Tonda, “Anggunce na nyalin yupu talibuka unamlum talak ara, diksukumuk upmunce, na ti, ilil tenepnumunce, si erebuka, ‘Allah ara weik mambule,’ tenen, na si erenamnlulume,” nyapdeiamse. Ayupu nyapdeiamse touk, teleb un ning nirya arelamsise. Na ap, anggun ap teleb kibuka neika ulamupu.

⁶ Atalak ara, sik Lewi yala nang arye peterelamik ning babye, dipkoprop ning uk peterelamik. Na arye nyalamse yupu uk peterelamik. Talye yupu ton fia kum peterelamik. Sik nirya ara, na ap ansinibuka ulamuburye, teleb uk ulamik. Tonda sik nirya arye, yuk nang ati, tilila yupu kum nyalamikce, yuk ninye talilamik ning nirya babye, ubula ton kum dolamik. Tonda, sik malye winilamik ning bataklamikce, yuk nang ati, ‘Anggun malye winilulum ning bataklulume,’ nyalamika deice arye, ninye weika arye, sik malye ning bataklamikce, teleb uk ulamik. Na tenelamse ning uk, diksukum teleb kibuka ulamikce fil dolamik.

⁷ Na tenelamse ning ara, ani. Sik imam-imam nang ara, dipkoprop sik fil dona diksukum ning uk talibuka unyakce, kel weik bikna ning nirya ara, anang aniryuk yuk ninye ati, teleb kibuka peterenamake. Yata ninye do nirya, ‘Se, yata wiripnamap do?’ tenen, kanye wangapne talak ara,

^e 2:4 *Allah* – Ibrani yupu deice arye, Allah el si ati, ‘Yahweh Sebaot’ sekik ning ara, deiyok lakak kibuka sekupu.

sik Lewi yala deiyok nang dam binuka asipdecop ura, 'Sik imam-imam nang arye, teleb yupu uk lak lenamaka,' tenelamse. Ara, talya ati kum nyapsine.

Na ara, Allah Yahweh aning-aning nirya talibuka deice tam erebuka uniryte, im deice yin talin malaikat nirya, sik weik deiyoknye ununa anya arye, na nyanye yupu laka nyapniba, sik imam nang kekebikirye, yuk talye daunyak kili sal nirya ati, 'Allah tenelye ning ara, ani, ani,' nyabuka, 'Laka nyabuka peterenamake' tenen, anang wipdeiyamsise. 'Wininamak' tenen, anang wipdeiyamsise bukni, aning ara, kum winilulume.

⁸Na tenelamse touk kum bukni, winitalak ara, anggun imam-imam nang ara, na arye, 'Wininamlulume, abisik banamlulume,' nyapsise ning ara, diksukum bisik batakumce, malye una bisik uk dobolbaluluma deice arye, anggunce yuk ninye ati, 'Wininamlulume,' nyabuka peterelulum ning ara, teleb ning ton kum peterelulume. Malye ning uk petereluluma deice arye, ninye nirya bobuka, malye una bisik uk bobalulumba, malye uk wininyake. Winiluluma deice, na arye anggun Lewi yala deiyok nang ati, nyalin yupu nyapdeiyamsisiryte, 'Aning ara wininamlulume, aning ara kum wininamlulume,' nyapdeiyamsise ning ara, fia moubuka talibuka, kum winimunce, yaniltalulume. Na arye Allah Yahweh, im deice yin talin malaikat, sik deiyoknye birye nyapsine.

⁹Ati anggun babye na arye, 'Israel ninye ati namin kanye bobuka peterelanamak,' tenebuka, anggun nong deice deipsise bukni, anggunce na yupu kekebuka kum winilulume. Na arye anggun ti, 'Teleb bisik uk moubuka peterenamak' tenen, nyapsise bukni, anggunce na ti batakanululumce, yuk ninye ati, peterelulum talak ara, kirikukapmunce talye yuk yupu uk tabakuka peterelulume. Tonda, yuk ninye ati yupu moulin talak ara, 'Na kwit ani, tonda anye bira na like' tenen, lipsisikuka yupu kum mouliululume. 'Teleb tenepnamsiak' tenen, yupu moulin talak ara, talye kwalin yupu nyamunce, mouliululume.

Winiluluma ati ara, na arye anggun ti malye kipdeipsiniba, sik yuk Israel ninye nirya eipsikirye, anggun ti, 'Se, sik Lewi yala deiyok nang, imam-iman nang ara, malye uk unyake,' nyapsicop ura, anggunda ikin kanye bobuka, alye dakalanamlume. Allah arye sik Lewi yala deiyok nang ati nyabuk.

**Israel ninye arye, Allah nyapdeiyamuk yupu yanibuka,
batakikece kil talye-talye dolalamika ati, nyabuk yupu**

¹⁰Nabi Maleaki birye Israel ninye ati nyabuk. Nun nirya nun ni koproba ara, tonok kum ulula ati do? Tonda, nun nirya ara, tonok Allah el dem arye kum kwepdeipsuka ati do? Ati ara, nunce yata ning ati, Allah arye nun apu yapu nang, sik deice nyalin yupu nyapdeiyamukce,

‘Aning uk talibuka unamlulume,’ nyapdeiyamuk ning yaniltanyap do? Winibibirye, nunce donyap kilapu ara, ‘Nun like’ tenen, talye lukparabuka batakanyabe. Winibya deice arye, minop talak, ‘Akil dopnirye, fia neika unamabe,’ nyabuka, nyalin yupu nyabupu ning ara, batakanyabe.

¹¹ Anggun Yehuda yala ninye ap, Israel yala-yala ninye nirya ap, tonda Yerusalem mutuku noutamak ululum ninye ap, anggun nirya arye malye weik winilulume. Malye umunya deice arye, Allah Yahweh el si erena aik ati, malye ulilulume. Anyaik ara, ‘Fia mambul aik,’ tenenyap bukni, anggun malye umunya deice arye, anyaik ati fia malye ulilulume. Anggunce malye winimunya ara, ani.

Ara, anggun amutuku umunye nang arye, Isa Mutuku Dongonye si uk erenyak mutuku kilapu dolalulume. Akilapu taruk mourulamunya deice arye, Allah Yahweh el si erena aik fum tam, noutamak akunum malye kililalulume. Ati Allah arye, ‘Aning ara wininamlulume, aning ara kum wininamlulume,’ nyabuka, nyalin yupu nyapdeiyamuk ning ara, akunum yaniltalulume.

¹² Isa si erenyak kilapu dolulum nang ara, ‘Aning ara mambule,’ tenilena kum dib aryuk, Allah Yahweh aning nirya talibuka weik mikip ulirye, im deice yin talin malaikat nirya, sik weik mikip deiyoknye, el si erena ati, ining ning obuka, uku dongolyangalulume. Winimunya ara, fia malye weik ati ara, na kanye ara, ‘Allah Yahweh arye, anggun awinilulum ninye nirya wenebuka opnamne,’ tenenune.

¹³ Tonda, yuk malye winin ning ton awinilulume. Ara, Allah Yahweh ati, arin ning delilyangana ati, keil lelebuka yangapdeibikak boyangamunce, malye kanye bobuka, asing maka deice arye, engemunce nyalulume. “Se, yata ati, Allah Yahweh el ti arepmap ning ara, kanye deibuka kum dopropmasil do? Yata deiyok ati, nun ni Allah ara, nun moronyap ning kekebuka kum aresulul do?” nyabuka engelulume.

¹⁴ Tonda anggunce, “Nun ni Allah yata ati batakasuk do?” nyabuka engelulume. Winimunya deice arye, asing maka sakasilirye, Allah arina ati, memebuka deibikak malye ululume. Adeice anggunce Allah Yahweh arina ati, ining ning obuka, uku dalulum ning ara, malye ululume. Allah arye, akunum batakusuka deiyok ara, laka nyapnusine.

Ara, talya ati kume. Anggun wel talak arye, Israel kilapu taruk mouruplumce, domlum talak ara, Allah Yahweh arye eipsukce bikamuke. Anggun ap, akilapu ap arye, ‘Kume, nunce fia neika unamaba ati ara, kum batakdanamabe,’ nyabuka nyalin yupu nyamlum ning ara, Allah arye akunum kekamsuke. Anggun domlum Israel kilapu ara, teleb uk ulamikce, yuk nang ap, neika yupu talibuka kum ulamikce, anggun ti kum batakamsik bukni, anggun sal aniryuk, akilapu talye lukparabuka batakamumce, yuk kilapu ap, neika malulume. Tonda, ‘Yuk mutuku

kilapu ton doptibye' tenen, anggun min yuma dopdanamlum kilapu batakmunce, malye weik umunya ati, nyapsine.

¹⁵ Anggun ton moubuka beta kum bikamlum do? Allah Yahweh arye, sal ap, kil ap, dopdalam talak ara, nong tonok atonun kum kilisulul do? Deiyok ara, sal babye, kilapu babye, dopdamunye talak ara, akil ap dukdongobuka nong tonok kilisulule. Dipkopropa anggun nong ap, kanye talima ap, dib kanye ap ara, Allah el ning uk ulule. Ati ara, Allah arye anggun nirya ati, utenesulule. 'Kume anggun nirya arye, Allah ap, nong tonok dukdongobuka ubirye, teleb ubuka mapu deibikirye, na nyanye yupu moubuka peterebikiba, sik mapu nirya kekekiryte, talinamak,' tenesulule. Ati ara, anggun bidamang uk, fia moubuka kel bikdamunce, 'Na dopse kil bataknarne' tenen, kalikdanamlulume. Anggun wel talak arye domlum kilapu batakna kumce, anggun ap fia neika unamlulume.

¹⁶ Aning ara, talya ati kum nyapsine. Ara, Allah arye, ayupu nyapdeipsuke. Anggun min yuma domunye kilapu batakamunye nang ara, na Allah arye yu weik unulula ati, weik arye wenepnamsine. Ara, Allah Yahweh, Israel ninye fia kalikuka melilulnye, anggun deiyoknye, Allah arye nyapsuka ati, aning ara weik mambule nyapsine. Allah Yahweh, im deice yin talin malaikat nirya, sik weik deiyoknye birye nyapdeipsuke.

Winipmanto ara, ninye arye, ton nang oplobikirye, adipmace nang sik ining palepmalye butum aling dobuka, ongobikcop ura, fia malye ulule. Ara, bico tenena kum ninye arye, aning atonun ning wininyake. Ati, anggun domunye kilapu batakmunyop ura, ara ayu un nang atonun ululume. Winina meme. Ati ara, anggun nirya arye, anggun bidamnye ati, 'Nun dobupu kilapu deiyok kum upmalibuk, talye batakibirye, yuk kilapu dobipyop ura, Allah arye yu kanye bopsilyak' tenen, fia moubuka kalikelanamlulume. Min yuma domunye kilapu batakna meme. Ayupu nirya ara, Allah Yahweh, aning-aning nirya ap, im deice yin talin malaikat nirya ap, sik weik deiyoknye birye nyapsile. Na Maleaki birye lak nyapsine.

**“Allah Yahweh arye, yupu bokeipnamle talak
ara, akunum dam uple,” nyabuk yupu**

¹⁷ Tonda, na nabi Maleaki birye ayupu nyapsine. Anggun malye ululum dib aryuk, Allah el dam yupu nyalulum ning ara, 'Na fia like weike,' tenesulule. Utenesulul bukni, anggun malye umunye dib aryuk, Allah Yahweh ati tamubuka asitolulume. “Nunda yata ning winibibya deice arye, Allah ati lik kilinyap do?” Ati, na Maleaki birye laka nyapnysine. Anggunce, Allah ati lik kililulum ning ara, ani. Ara, anggunce nyalulume. “Malye wininyak ninye nirya ati ara, Allah elce teleb uka tenesulule. Tonda, diksukum teleb uk ulul Allah ara, dan sukum ulul do?” nyabuka

asiltolulume. Winimunya deice arye Allah ati lik kililulume. Maleaki birye Israel ninye ati nyabuk.

**Allah Yahweh arye, ninye nirya wenepirye, yupu
bokeipnamle talak yanamla ati nyabuk yupu**

3 ¹Allah Yahweh arye nyabuk. Anggun nirya moubuka dipdelulume! ‘Na yupu laka nyalbanamle’ tenen, na arye wipdeipniba yanamlanye bira, na bisik yalina ati dopdeipniba, el minopce yalirye, na bisik yabuka kintinipnamnile. Akunum kintinipnilyop ura, na talya karin arye yanamne. Anggunce enumunye, na Allah Yahweh ara, na si erena aik koproba noutamak uk yanamne. Tonda, anggun kanye deiplumce, ‘Se, Allah el nyalin yupu nun dam laka lelyanamlanye bira, minopce yanuka nyapsutue,’ tenemunye bira, dipkoprop minopce nyalyanamsile. Na ara Allah Yahweh, aning-aning ap, im deice yin talin malaikat nirya ap, sik weik deiyoknye birye nyapsina ati, dipkoprop winipnamle.

²Bukni, na ara Allah Yahweh yanamne sum ara, yatanye birye fia darapdongobuka tikture, na eipnutu do? Na yanamne sum ara, kat weik ning uku dana deiyok nang arye, uku dongobikiba, mil parapirye, malye ning nirya diplirye, teleb ning uk laka nyelelamle touk, na arye malye un ning, aning-aning nirya, fia kum daneipnamne. Winipmanto ning ara, sabun mikip ning memena deiyok nang arye, memebuka deibikirye, nininga palepmalye butum aling, asabun arye mek likikiba, fia teleb kibuka liklamak touk, na arye malye ning nirya kum kipdeipniba, diksukum ning uk tuba unamle.

³Na yanamne sum ara,^f malye ulamice ninye ap, teleb ulamikce ninye ap ati, yupu lipsisikuka bokolina ati yanamne. Na ara, yupu lipsisikuka bokolina deiyoknye unune. Winipmanto ara, dekna weik ning el si perak, uku dabikirye, moubuka dinmakibuk, uku arye malye wamlye nirya uku diplirye, teleb ning uk laka upliba, aning dobuka, moubuka memelamak touk, na arye malye ning aning-aning nirya, kum kipdeipnirye, teleb kipdeipnamne. Malye ning bataknamne. Teleb ning ara, na tenen deipnamne.

Aning atonun, dekna fia weik ning emas do, perak do, malye wamlibuk, teleb kililamak touk, na arye sik Lewi yala nang, imam-imam nang nirya ati, yanuka yupu lipsisikuka bokeipnirye, teleb kipdeipnamne. Winipnyop ura, sik Lewi yala deiyok nang arye, ila tuba tamubuka na Allah Yahweh ati, ining ning obuka arilyakirye, na si erena ati, uku

^f **3:3** *sum ara* – Ton Allah yupu buku noutamak ara, ‘asum ara,’ nyalamak bukni, ton buku noutamak ara, ‘talak ara,’ nyanyake. Nun mitik ton walwal usulule. Tonok sum deice arye ninye nirya wenebuka yupu bokeipnamle do? Tonok sum kum bukni, tonok talak noutamak arye afil donamle do?

dongopnamake. Winibikiba, na Allah arye kanye deipnamne. Na arye sik ti teleb kipdeipniba, na tenenye touk wininamake.

⁴Sik akunum teleb kipdeipniba, minop talak Yehuda yala ninye ap, Yerusalem mutuku ulamik ninye ap, sikce na Allah Yahweh ati, arin ning boyangalamikce, uku dongolamik touk, aminyan talak babye, na arina ati, teleb ning arilyanganamniake. Winibuka arilyangalamnicop ura, na arye sik ti, kanye delinamne. Ati, minop talak Allah ap dukdongobuka, teleb ulamik touk, aminyan talak tamubuka batakdongopnyop ura, sik ap, na ap, teleb kibuka neika unamabe.

⁵Na Allah arye, anggun dam yanamne talak ara, talye ati kume. Anggun wenebuka yupu lipsisikuka bokolina ati yanamne. Tonda, na minopce yanamne talak ara, anggun asing keten nang ap, tonda kil talye-talye yolana nang ap, tilila yupu nyana nang ap ati, 'Anggunda dipkoprop malye ululume,' nyabuka, weik arye wenepnamsine. Aning atonun, bona utotoa kum nang ati, weik ikin fil arukikiba donyak bukni, dekna mitiktonun arinyak nang ap, youwak kilapu ap, kwaknamne mapu ap ati, sik ning ubula dolonyak nang ap, tonda ninye asik nang ati deiyok kum upmalibuk, malye yupu sik deice nyanyakce, malye kinyak nang ap nirya ati, na yanirye, 'Anggun malye weik ululume,' nyabuka wenepnamsine.

Deiyok ara, sik amalye-malye weik wininyak nang arye, na ti ilil kum ulule. Sikce na si kum ereninyaka ati, yanirye, sik ti wenebuka oplopnamne. Na Allah Yahweh, im deice yin talin malaikat nirya, sik weik deiyoknye birye nyapsin ning ara, dipkoprop winipnamne, nyapsine. Allah arye Israel ninye ati nyabuk.

**Israel ninye arye min yuma ning ap, teleb ning ap, Allah
ati bokuka kum arelyangalamika ati, wenebuk yupu**

⁶Allah arye nyabuk. Na ara Allah Yahweh, fia min kume kum danmantonye unune. Minop talak ulamse touk, winitalak babye do, aminyan talak babye, fia ati aunamne. Na si ton fia kume kum danamnile. Na arye nyalin yupu nyapyop ura, fia kum luba kinune. Fia teninune. Ati ara, anggun Yakub birye deiyamsukba, dadeipdanin yangalulum ninye ara, malye weik umunya ati, talye lukparabuka wenebuka, obuka sirya dakamsitinye bukni, aning ara min kum winipsise.

⁷Anggun apu yapu nang ulamik arye dipdongobuka, atalak-atalak noutamak nirya ara, na arye, 'Wininamlulume, aning ara kum wininamlulume,' nyapdeiamsise yupu, yanibuka batakululume. Na arye nyasinye yupu uk talibuka dukdongobuka kum dobolbalulume. Ati ara, anggun adib aryuk, tamubuka na dam yanululume. Yamunyop ura, na arye batakisise ning ara, ila tamubuka anggun ti dilyanamsine. Na Allah Yahweh, aning-aning nirya talibuka, im deice yin talin malaikat

nirya, sik weik deiyoknye birye nyapsine. Bukni, anggunce nyalulume, ‘Se, nunda nun Ni Koproba Allah, el dam arye batakuka, yukak kum bindobupa anya arye, yata wiribibirye tamubuka, Allah dam binamap do?’ nyalulume.

⁸Winibuka nyanululum bukni, winitalak ara, na arye tamubuka anggun ti asipdenusine. Ninye arye Allah ati, tilila yupu nyaltakanyakce, el na tenen ning ubula dona teleb do? Aning ara, dipkoprop malye bukni, anggunce tilila yupu nyamunce, na tenen ning ubula dolonululume. Ara, na arye, ‘Anggun wenye kwaning ap, min yuma teleb ning ap bokuka, na si erena ati arelyanganamnululume,’ nyapdeiamsise bukni, anggunce tilila yupu nyamunce, aning ayala-ayala nirya, ubula dopropmunce, na dam kum boyanganululume.

Dipkoprop aning ara, kum nyapnutum bukni, anggunce na ti nyalulume. “Kume, aning-aning nirya ara, ‘Allah arye aresulule’ tenen, weinye kwaning ap, min yuma teleb arin ning ap, noutam bokuka, Allah arina ati, dan talak arye, ubula dolamupu do? Dan talak arye tilila yupu lelamkupu do?” nyabuka asilenululume. Bukni, na dipkoprop nyapsine. Na kele, anggun Israel ninye arye, tilila yupu nyamunce, na si erena ati arina teleb ning ara, na dam kum arelyanganululume. Anggun dem aniryuk ubula dololulume.

⁹Winimunya deice arye, anggun amutuku noutamak umunye ninye nirya arye, na ti tilila yupu nyaltakanumunya ati, na arye, ‘Anggun nirya malye un ning uk doproprnamak’ tenen, supdeipsisiba, winitalak ara anggun talilulum ning ap, koululum ning ap, anggun mutuku ap nirya, malye uk ululba, ikin asa uk ululume.

¹⁰Minop talak arye nyapdeiyamsise touk, ila tuba tonap nyapsine. Ati ara, anggun talibuka umunye ning ton aupmasilyop ura, ‘Aning bokuka, winibuka-winibuka arenamnulume,’ nyapsise touk, weinye kwaning ap, kam un ning ap, min yuma teleb arin ning ap, dobukapmumce, na Allah si erena aik bobuka arilyanganulume. Winipmunba, na si eren aik koproba fum tam ara, din ning weik upnamle. Kum suknamle. Na arye anggun ti, ‘Winibuka arenamnululume,’ nyapdeiamsise touk, winipnumunya deice arye, anggun din ning nirya ara, fia weik upnamsile. Kume kum danamsile.

Na Allah Yahweh ati, ton yanuka nyapnululume. Anggunce na nyapmasin touk winipnumunyop ura, na arye im deice din ning yangan bisik bublan kukeipniba, anggun dam din ning ap, yuk teleb ning ap, fia weik upliba, anggunce dopmankumce, fia weik upnamsile. Anggunce, ‘Dib do, tilila do,’ tenena kume. Piripmunyop ura, eipnamlume. Aning-aning nirya weika arye arenamsine. Na Allah Yahweh, im deice yin talin malaikat nirya, sik weik deiyoknye birye, na arye nyapsina ati, dipkoprop winipnamle.

¹¹Tonda, na arye anggun din ning koununye ning, bok nirya dilul ning ap, nong malye ulul ning ati, yupu sekniba, tonap kum dinamsile. Tonda, nong bol malye kum unamsile. Teleb uk unamle. Tonda anggur tapu nirya babye, teleb ubuka bongobuka paplirye, bok teleb kibuka paplirye, duk weika arye mounamsile. Na Allah Yahweh, im deice yin talin malaikat nirya, sik weik deiyoknye birye nyapsina ati, dipkoprop winipnamle.

¹²Winipsiniba, anggun unamlum mutuku nirya, ulul ning nirya fia teleb upnamle. Tonda, anggun unamlum mutuku noutamak babye, tuku teleb aripnamsine. Winipnyop ura, yuk pera mutuku unyak ninye mutuku-mutuku nirya eipsikirye, ‘Se, sikda teleb kanye bobuka fin-fin asa arye unyake,’ nyanamsiyake. Na Allah Yahweh, aning-aning nirya ap, im deice yin talin malaikat nirya ap ara, sik weik deiyoknye birye nyapsina ati, dipkoprop winipnamle.

¹³Allah Yahweh arye nyabuk.

“Teleb kipdeipnamsine,” nyapsin bukni, dipkoprop anggunce na ti malye yupu weik nyanululume. Bukni, anggunce nyalulum dib aryuk, tamubuka nyanululume. “Kume, nunce Allah an dam ara yata malye yupu nyakinyap do?” nyabuka asilenululume.

¹⁴Ati ara, anggunce na ti malye yupu nyanululum ning ara, nyapnusine. Ara, anggunce nyalulum. “Nunce Allah el si erenyap ning ara, deiyok kum bukni, talye atibuk erenyabe,” nyalulum. Tonda, “Allah elda aning-aning nirya talibuka, im deice yin talin malaikat nirya, sik weik deiyoknye ulul bukni, elce nun ti, ‘Wininamlulume, aning ara, kum wininamlulume,’ nyalisilye yupu ara, dobolbanyap bukni, winibibya deice arye, yata teleb ning ton dolonyap do? Urtalya ati wininyaba anya arye, aning ara nun like,” nyanululume.

Tonda, anggun nirya arye, ‘Nunda el nyapdeipsuk yupu talibuka unamap’ tenen, winilelamupu bukni, ila tuba ton malye winibibyop ura, Allah el dam ati, “Se, nunda malye wininyap nang anya arye, namin kipsimince, lyepsilyame,” nyabuka, “El dam anyuk binuka loplobibiry, el amutam uk una ara, deiyok yata ning ati wininamap do? Aning nirya ara, nun like,” nyabuka, malye yupu nyanululume.

¹⁵Tonda nyanululume. “Nun bidamnye asing arye akunum elinyabe. Ara, sik kanye talima fum tam erelana deice arye karye dobuka, kwalinyak ninye babye ara, ikin ning ton sik nong deice kum yangalule. Teleb aryuk ukirye, teleb kanye bobuka, kil-kil asa aryuk unyake. Tonda, sik malye wininyak nang nirya babye, dekna weik ning dopdobikirye, bona weik talin nang unyake.”

Tonda, malye unyakce, “Malye winin ning uk winibirye, Allah ati winipdenuyabe,” nyalulum. ‘Allah arye nun ti wenebuka kum opnamsile,’ tenekirye, “Fia mandipna kanye bobuka, kum kekamna

atonun malye-malye uk wininyak nang ara, tuba teleb uk unyake. Allah arye sik ti kum oplirye, ikin ning sik dam kum yangalule. Ati, anang malye wininyak touk, nun babye atonun wininamabe,” nyanululume. Allah arye Israel ninye ati nyabuka wenebuke.

**Allah arye, “Sirya talak ara, bico tenebuka, Israel
ninye lyepnamsine,” nyabuk yupu**

¹⁶ Allah arye Israel ninye ati, weik arye wenebuka, Israel ninye kankan, sikce Allah ati, tuba ilil ulamukba, diba tenebuka ulamik ninye arye, bulubuka yupu talipmikce, yupu nyalanmikba, Allah el si Yahweh arye, sik talipmek yupu kekebuk. Sik tuba dib tenen kili sal ap, sik kayapu dib tenen ninye ap arye, amambul yupu buku dobuka sekik. Ara, ‘Nun Ni Koproba Allah Yahweh ati, tuba dib tenebuka el ti ilil tenebuka unyap ninye ara, nun si abuku noutam sekenamabe.

Tonda, Allah ati kanye deibuka ubirye, tuba-tuba tenebuka el si uk erenyap ninye ara, nun si abuku noutamak sekenamabe. Aning sekibirye, luba kina kumce, fia tuba tenena uk unamabe. Tonda Allah arye, aning eiplirye tuba tenenamsile,’ tenebikce, dib tenen ninye si abuku noutamak sekik.

¹⁷ Winibikop ura, Allah Yahweh aning niryta talibuka, im deice yin talin malaikat niryta, sik weik deiyoknye birye eibukce, ayupu nyabuk. “Sikce na si tuba ereninyak ninye niryta ara, na mapu koproba, na tenen ninye unamake. Tonda, na tenepse sum akunum uplyop ura, ninye niryta ati, yupu lipsisikuka bokeipniryte, wenepnamne. Atalak ara, sik aninye ara, na mapu koproba, na kanye delin ninye unamake. Ara, na arye sik ti tuba bico tenenamne.

Winipmanto ara, el mapu deiyamlinye bira, tonok mi arye, ‘Na ni koproba’ tenen, el nyapmalye yupu kekebuka melilamlye mi ara, el li birye, ‘Na mi koproba,’ tenebuka melilamle touk, na ti tuba diba tenenyak ninye ati, atonun tenebuka wininamsine. Ara, na ti diba tenebuka, na si ereninyak ninye ati bico tenen lyepropnamne. Sik wenebuka kum oplopnamne.

¹⁸ Aning niryta akunum winipnyeba, na mapu anggun niryta arye eipmunce, kel biknamlume. Ara, sik teleb uk unyak nang ara, sik urasin laka upliba, eibuka kel biknamlume. Aning atonun, malye ning uk talibuka unyak nang babye, sik urasin laka upliba, eibuka kel biknamlume. Ara, na si erepnikiryte, na amutam unyakce, na fil uk donyak nang ap, tonda na si kum ereninyak nang ap ati, na arye yupu lipsisikuka bokeipnamsin talak uk, eibuka kel biknamlume. Na Allah Yahweh arye nyapsine.” Allah arye nyabuk.

**Allah Yahweh elce ninye niryta ati, yupu lipsisikuka
wenepnamle sum ati nyabuk yupu**

4 ¹ Allah Yahweh aning-aning niryta talibuka, im deice yin talin malaikat niryta, sik weik deiyoknye birye nyabuk. Dipkoprop, na

tenepse sum, akunum uplyop ura, malye unyak ninye ap, talima erelan deice arye, erepdanuka kwalinyak ninye ap nirya, na arye wenebuka oplopnamne. Winipmanto ara, koluplirye, kel-kel alamle ning, uku dinibikiba, minopce uku buk paplirye dilamle touk, sik amalye wininyak ninye nirya wenepnirye, obuka sirya daknamne. Atalak ara,⁸ sik amalye unyak ninye ara tonok ton kum bataknamle. Weik uku dinmalirye, yo deiyok ap, taruk ap, yating nirya ap, dibuka kum danalamle touk, sik amalye wininyak ninye nirya wenepnirye, obuka sirya daknamne.

Atalak ara, sik amalye wininyak ninye ara, sirya ton kum bataknamne. Wimipnamne talak ara, sik yala ninye nirya babye, fia kum upnamake. Ati, doryanamle talak ara, amalye unyak ninye, sik yala nang arye, mapu ton deibuka kum punupnamake. Sik yala nirya kum danamake.

²Bukni, anggunce na ti, ‘Allah elda weik mambule,’ tenebuka, na si erenululumce, na nyapdeiamse yupu uk moubuka talipmunce, ululum ninye nirya ati, na mikip ara, anggun deice deipsiniba, keteng delilamle touk upsilyop ura, teleb kipdeipsinirye, lyepnamsine. Winipsinya deice arye, anggun ikin usilye ning nirya, kum daneipnamsine. Winipmanto ara, sapi basam mi foka fum tam dongamica ani, apoka fum bisik arye kubuka, bai tam bilirye, weik kanye delilamle touk upmunce, kanye delinamlume.

³Winipnamsen talak ara, na arye tenepse touk, dipkoprop winipnamne. Adeice na arye sik malye wininyak ninye nirya obuka sirya daknamne. Sik amalye winina ninye nirya obuka batakriba, sik anang deice ara, tuku butbuta deice yanibuka balamlum touk ubuka, sik nong deice arye, yanibuka banamlume. Na ara Allah Yahweh, im deice yin talin malaikat nirya, sik weik deiyoknye birye nyapsina ati ara, aning nirya dipkoprop winipnamle.

⁴Ati ara, na amutam ulamukce, na fil dolamuknye Musa elda, na ap, Sinai mutuku deice epdantumurye, na arye el ti, ‘Israel ninye ara, aning wininamake, aning ara kum wininamake,’ nyapdeiyamsiba, sekamukce peterelamsuk ning ara, moubuka tenepmunce, aning uk talibuka unamlulume. Ara, na mapu anggun Israel ninye ayala-ayala nirya ati, nyapdeiamse yupu nyapsine.

⁵Bukni, anyapnusin yupu moubuka kekepmunce, ‘Dan talak winipnamle do?’ tenen, dina uk unamlulume. Ara, ‘Weik imun ning winipnamle’ tenen, kintinipdeipse sum, na Allah Yahweh arye ninye nirya ati yupu lipsisikuka bokeipnirye, malye wininyak nang

⁸ 4:1 *atalak* – Ton Allah yupu buku Alkitab noutamak ara, ‘tonok sum’ tenen, ‘sum’ sekenyake. Ton Alkitab noutamak ara, ‘Tonok sum kum bukni, like mitik weik upnamle’ tenen, ‘talak’ sekenyake. Bukni, Ibrani yupu ara, mitik ikin ati ara, nun nirya mitik walwal uk unyabe.

wenepnamne sum, min kum upmalye talak ara, minopce na arye na yupu lak lenanye, nabi Elia dopdeipniba, anggun dam minopce yanamle.

⁶Nabi Elia yalyop ura, anggun mapu deiamunye nang nirya ap, anggun mapu nirya ap, ansinipdeipsiliba, anggun nirya tonok kanye bobuka, teleb ubuka neika unamlume. Ara, anggun tonok kanye kum bopmamunyop ura, ‘Se, Allah yalirye, anggun umumnye mutuku noutamak arye yanuka, malye winimunye ninye wenena ati, nun nirya obuka, kum kipdeipsiliry, nun nirya ap, nun mutuku tuku ap ati ara, malye yupu nyabuka subsilyak’ tenen, kanye moubuka unamlulume. ‘Winipsinyak’ tenen, na arye nabi Elia dopdeipniba, anggun nirya bulubuka tonokak delina ati, minopce yanamle. Allah arye Israel ninye ati nyabuk.